

## A UN PREDI

Siôr plevan,

za dîs, Lui al mi à fate osservazion, cun bieles maniere, parcé che 'o soi un di chei che tàin la cuarde ogni volte che lui al monte sul impulpit. Al moment j ài rispuindût nome che mi plasares une vore dj plui sintîlu a pradicjâ par furlan: cumò, s'al mi permet, o' spiegarai un fregul il gno pinsîr.

No mi sta a mè, di dâj leziions sul cont de sacre eloquenze. Lui al à la sô scuele e al à libris e al varà lis diretivis dai siei superiôrs. Ce ch'ò pues fâ jo, al è nome di fâj savê il risultât de sô peraule sun tun cristian di qualchi pratêse, o il struc des cjacaris di chei che no àn tropis pratêsis. A' son robis che, salacôr, chealtris no òlsin a vignî a dîes su la muse; e Lui al é paron di fâ chê stime ch'al crôt.

La plui part di chei ch'a vègnin a sintîlu a' son int che lêi qualchi sfuei (se no altri la «Vite Catoliche» che Lui al mande pes fameis), ch'a scòltin l'aradio (cumò lu àn ancje i contadins), ch'a vadin qualchi volte al cine, ch'a son stâz pôc o trop atôr pal mont di soldâz o a vøre o pai lôr afârs; insumis a' son plui dispatussâz di chei di une volte. Prin di fevelâur in public nol sares mâl pensâ su ce che si à di dî e ancje cemût che si à di dîlu. Lui al fevele par talian; un talian che Diu j al perdoni: *«il fatto che abbiamo letto nel vangjêlo di ogj ci ha da insegnâre...»*. Tal aradio no fevelin cussì: Lui no si visial? Ma ce ch'al fâs ancjemò plui fastidi e ch'al fâs scjampâ di glesie une vore di lôr 'e je la sfilze di robis fûr di ogni atualitât e di ogni rapuart cu la realtât di vite, cui intares, cui pinsîrs e cu lis strùssiis di uê, che Lui al strucje fûr; al è chel fevelâ di cjosis incontrabilis, cence fundament: *«in questo gjorno li angjeli del cielo, con le ali variopinte, fano luminôsa corôna intorno al trôno dela Vergjne benedêta...»*; 'e je chê mufe di retoriche che, ogni pôc che si la tamêsi cul pinsîr, 'e comparis ueide di qualunche sostanzie, qualchi volte ancje ridicule. Chealtre di al à finît il so sermon cun tune tirade di chest gjenar: *«Madre celeste, questo popolo si consacra tuto a Voi (ce oressial dî in concret?); questi uomini laboriosi vi consacrano i loro sudôri (ma i umign a' consacrin i lôr sudôrs a fâ boli la cite e al bocâl di fieste): questi gjovinoti Vi consacrano le loro vergini forze (al sa pûr, ancje lui, a ce fâ che si scunissin i fantaz!); queste ragazze vi ofrono il loro cuôr intemerâto gjenerôso...»* (tra chês fantatis 'è jere mê cusine Tilie che zaromai 'e varà oferît il so cûr gjenerôs a trente di lôr; ce uelial ch'è fasi la Madone di une zavate dj chê fate?) e vie indenant. Al mi à pursì capît!

Se lui al fevelas par furlan, prin di dut nol urtares lis orelis cun chê prunzie fûr di square; e po' dopo, 'o soi sigûr che al sares plui pusitîf e tanc' stupidez no ju poderes nancje dî: parcè che il furlan al e une lenghe che no à peraulis par navigâ tal ueit, e co si lu fevele, si reste par fuarze cui pîs par tiare, si sint di bessôi di no podê fâ bufulis di savon pàrie, si capîs subît, par istint, se il discors al scjampe tai nûi

o s'al si piart te fumate. No si pò fâ retoriche par furlan; `e je une contrarietà di nature. Il furlan al è la lenghe fate daûr misure pal nestri temperament e pe nestre mentalitât: e noaltris no nus stufe.

Ch'al provi, e mi savarà a dí. Lu riverìs, siôr plevan.

(Patrie dal Friûl – 1950)